



# Go lebelela setšhaba se fedišwa ke Covid-19

Sepedi



# Go lebelela setšhaba se fedišwa ke Covid-19

Mongwadi ke Notozi Mgobozi  
Moswantshi ke Heidel Dedekind



Rapelo ke mošemane wa mengwaga ye seswai  
(8) yo a tsenago sekolong sa phoraemari sa  
Marishane go la Sekhukhune.

O ile a ntšhetša maikutlo a gagwe go mmagwe le  
bagwera ba gagwe mabapi le Covid-19.



Ke mathomong a kotara ye mpsa gomme  
Rapelo o tšogetše go ya sekolong ka morago  
ga maikhutšo a matelele; ka lebaka la gore o  
tseba barutwana ba bararo bao ba fetetšwego  
ke bolwetši bjo.

O ile a kgopela mmagwe tumelelo ya gore a se  
ke a ya sekolong mošupologong woo ka lebaka  
la gore o bolawa ke mala ebile ga a nyake go  
hlokofala, eupša mmagwe a gana.

O ile a leka mankanyana ka moka ao a nago le  
ona, eupša mmagwe a se fetole monagano.

A emeleta ka pefelo, a hlapa, a apara a be a  
tšea mokotlana wa gagwe wa sekolo a befetšwe  
kudu; a leba sekolong a apere sepipamolomo sa  
gagwe sefahlegong.

Ge a fihla sekolong, a lemoga phetogo ya ka  
moo dilo di bego di dirwa ka gona peleng, le  
ka moo di thomilego go dirwa ka gona. A fola  
mothalong wo o bego o le ka ntle ga kgorwana  
ya sekolo a maketše.



O ile a botšiša barutwana ba bangwe ka ga temogo yeo le diphetogo. Ba mmotša gore ba ile go ba hlola themperetšha le go ba botšiša dipotšišo ka ga maphelo a bona.

Ge sebaka sa gagwe se fihla, morutiši a mo tšeа themperetšha, a kgopelwa gore a bule diatla tša gagwe gomme a mo fothela ka sanithaes. Ka morago ga moo a mo šupetša go leba phapošing ya gagwe.

Le moo, a kopana le se sengwe gape sa go mo makatša, moo dithaka tša gagwe di bego di dutše ka go katologana ebile ba apere dipipamelomo difahlegong tša bona.

Morutiši a hlaloša ka moo dilo di tlo dirwago ka gona go tloga nakong yeo go ya pele, ka ga diphetogo tše di tlo šomago ka nako ya go raloka.

Ge sekolo se etšwa, a leba gae a nyamile kudu a tšhogetše bophelo bja gagwe, mola go be go na le dilo tše ntši, tše a di beakanyeditšego bophelo bja gagwe.

Ge a fihla gae, a botša mmagwe nnete ya gore ke ka lebaka la eng a be a šomiša mankanyana mosong. Le ge go bile bjalo, o be a tlamegile gore a ye sekolong ka mehla ntle le go širela.

O ile a itemogela setatamente se sengwe gape sa go tšoša ka phapošing, sa gore sekolo se tlo tswalelwa ka lebaka la gore barutwana ba bangwe ba be ba fetetšwe ke birase ga mmogo le mahu a barutiši ba bangwe.

Go ile gwa tšewa sephetho sa gore barutwana ba šireletšwe gore ba se fetetšwe.



Sekolo se ile sa tswalelwā lebakanyana gore se kueletšwe (fumikeitwe) le go hlwekišwa ka dihlwekiši tše maatla go bolaya birase. Tsebišo ye ya nameletša letšhogo go barutwana ba bangwe le barutiši.

Tsebišo ye nngwe gape ya hlagelela ya gore barutiši ka moka bao ba nago le mengwaga ye masometshela le ka godimo ba šome ba le ka gae, ka lebaka la gore ba be ba lebane le kotsi ye kgolo ka maphelo a bona.

Batho ba ile ba hlokofala, batho ba be ba tšhogile. Bao ba bego ba feteditšwe ba beelwa thoko matšatši a lesomenne (14). Ditaba di ile tša phatlalatšwa dikuranteng ka moka mabapi le bolwetši, diyalemoya le dikgokaganyo tša leago, o efa dipalopalo tša mahu, diphetetšo le bao ba phonyogilego birase.

Rapelo a tšhoga a be a se sa nyaka go tšwela ka ntle ga ngwako wa gabō, a ipona a feteditšwe. Mopresidente wa Naga a fa ditsebišo tše mmalwa mabapi le seemo sa naga, gomme se sa feletša se hlotše gore batho ba tšhogele maphelo a bona.



Ka letšatši le lengwe Rapelo a boa gae go tšwa sekolong, a botša mmagwe gore ba boditšwe gore ba tle ka matšatši a mantši ao a bego a beakanyeditšwe kreite ye nngwe le ye nngwe le phapoši ka lebaka la gore ba kgone go dula ka go katologana gomme ba se fetetšane. A bolela ka go kgotsa, "Joo Mma! Ga ke bone ke tla atlega ngwageng wo, ke be ke itshepišitše gore ke tla ba morutwana wa Kreiti ya 4 ngwaga wo o tlago. Ke duma ge nkabe bolwetši bjo šetše bo fetile."

Mmagwe a dula fase le yena a mo dira gore a kwešiše gore tšohle mo lefaseng di na le nako ya tšona, re swanetše go no ema go fihlela ge tšohle di okobala, gore re tsebe diphetho tše di tla tšewago kua sekolong gomme re kgone go tšwela pele. Rapelo a lahlegelwa ke tshepo ge a nagana mengwaga ya gagwe ya bonnyaneng. Dikolo di butšwe le go tswalelwa ka mabaka a mmalwa. Ka dinako tše dingwe barutwana ba a dula ba se ye sekolong lebaka la kgwedi goba tše pedi, gomme ka moka ba dula ba sa thaba le gatee.





Yo mongwe wa batswadi a re, "re swanetše go rapelela seemo se ka lebaka la gore dilo di senyega di eya pele." Morutiši a ba hlohleletša ka gore, "tše ka moka di tlo feta; a re beng le tumelo.

Barutwana ba swanetše go šoma ka thata mošomong wa bona wa sekolo ba le ka gae le sekolong. Re emetše mafelelong a ngwaga ka nnete go bona seo se tla diregago ngwageng wo o tlago."

"Ye ke histori yeo e ka se lebalegego go bohle."

Re tlo abelana ka maitemogelo a Covid-19 le barutwana ba bangwe mengwageng ye e tlago ka moo e feleditšego e šarakanya dikolo ka gona, gomme lefase ka moka le eba ka tlase ga kgatelelo ye kgolo.

"Go na le selo se tee feela seo se ntlišetšago letšhogo, e lego fišwa ga dikolo. Ga ke na le bonnete bja gore sekolo sa rena se tla atlega go efoga maemo a mohuta wo," a realo Rapelo.

"Seo se tlogago se befile kudu, morutiši wa rena o sa tšwa go re botšiša ka ga dikgetho tša rena tša bophelo ge re gola. Ke mmoditše gore ke nyaka go ba ngaka ya diphoofolo gobane ke rata diphoofolo.

Barutwana ba bangwe ga ba nyake go boela sekolong gona bjale. Ke ipotšiša gore ba tlo fihlelela ditoro tša bona bjang ge ba sa nyake go ithuta."



Dikolo di ile tša feletša di butšwe ka morago ga maikhutšo a matelele, gomme batswadi ba biletšwa kopano yeo ba bego ba tlo boledišana ka ga go tšwetša dilo pele.

Hlogo ya sekolo a ba tsebiša gore barutiši le barutwana ka moka bao ba bego ba feteditšwe ba fodile, gore batswadi ba seke ba tshwenyega ka ga polokego ya bana ba bona kudu ge ba tla be ba obamela melawana ya polokego.

Barutiši le bona ba latela melawana ya polokego ka phapošing ya barutiši go efoga phetetšano. Theeletša tseo ba di abelanago mabapi le tseo di diragalago ka diphapošiborutelong tša bona, go šitišana ga barutwana ka nako ya tshepedišo ya thuto.



Ba a ngongoregelana ge ke le gare ke ruta.  
Mahlomola a goeletša, "Matome o gohlola ntle  
le go bea letsogo molomong wa gagwe." Ge ke  
sa re ke a araba, Mapula a goeletša, "morutiši,  
Selaelo ga se a apara sepipamolomo gomme o  
ethimola kgafetša-kgafetša."

Ka swanelwa ke go emiša ka thuto gore ke  
swaragane le seemo seo.


Dingongorego tša Rapelo ka ga sekolo di a  
namelela, o lahlegelwa ke boroko ka lebaka la  
ditoro tše mpe ka ga bolwetši bjo.

Mmagwe le yena o a tshwenyega ka go bona  
morwa wa gagwe a tlaišega ka letšhogo.

Hlogo ya sekolo o šoma ka thata go theoša  
kgakanego magareng ga barutiši le barutwana.

Rapelo a kgopela mmagwe gore a mo thuše  
go ngwala sereto seo e lego kgale se le ka  
mogopolong wa gagwe. Ba tšere matšatši ba  
ngwala sereto se go fihla ba se fetša.

A iša sereto sekolong gomme a kgopela morutuši  
gore a balele phapoši ka moka.



## Ke Tšhogile!

Ke tšhogile

Mma le yena o tšhogile

Morutiši wa ka le yena

Wena ga se wa tšhoga?



Re kwele ka ga bolwetši bja bja

go bolaya ka diyalemoya


Re bo bone Thelebišeneng

Re badile ka ga bjona Dikuranteng

Re kwa le batho ba bolela ka bjona setšhabeng

Bjo! Ke bolwetši bja go bolaya ebile ke a tšhaba





Ke tšaba go etela bagwera ba ka  
Ke tšaba go raloka le bagwera ba ka  
Ke tšaba go ya sekolong  
Ke tšaba le go ya toropong  
Ke na le letšhogo

Ke tšaba go lwela ditokelo tša ka  
Ke tšaba go abelana ka dikakanyo tša ka  
Ga ke kgone le go bogela dipapadi  
tša ka tše ke di ratago  
Dibopiwa ka moka di phela ka letšhogo  
Ke ka lebaka leo ke nago le letšhogo le





Bolwetši bjo bo nkutsweditše lethabo la ka  
Bolwetši bjo bo nkutsweditše ditokelo tša ka  
Bolwetši bjo bo ntšeetše maphelo  
a bagwera ba ka  
Bo tšere maphelo a batswadi le bana  
Ke tšhogela bophelo bja ka

Ke hlapa diatla tša ka kgafetša  
ka sešepe le meetse  
Ke tšea matsapa ka moka ao  
ke eleditšwego ka ona  
Ke dula ke apere sepipamolomo sa ka  
Eupša ke sa tšhaba Covid-19  
Tloga Covid-19, tloga!  
Ke nyaka tokologo ya ka





Ke nyaka bophelo bja ka  
Ke rapelela tokologo ya bana  
Mo dinakong tše tša go tšoša  
go se nago le tshepo  
Ke leboga Morena ka polokego ya ka  
Ke tšhogile! Ke tšhogile! Ke tšhogile!

Re holofela gore go tla ba le phodišo  
Dingaka di tla hwetša phodišo  
Bolwetši bo tla tloga  
Re tla thaba gape.



# DITEBOGO

**Mongwadi ke**

Notozi Mgobozi

**Moswantšhi ke**

Heidel Dedekind

**Molekodi ke**

Ntombikayise Njadai

Nelisa Mviko

Nopasika Xapa

**Mohlami ke**

PixelPing Design

**Mofetoši wa puke ke**

Maureen Ramusi

**Motsinkedi wa puku ke**

Makoma Phatudi



ISBN 978-0-638-00809-8



basic education

Department:  
Basic Education  
REPUBLIC OF SOUTH AFRICA



LET'S GET SOUTH AFRICA READING

